

Evening Dogri News Bulletin, 09 October 2024

इवनिंग डोगरी न्यूज़ बुलेटिन

समे-18:15 Hrs

<><><><><><>

Headlines

- नेशनल कांफ्रेंस ते कांग्रेस भ्याल 90 मिम्बरी असेंबली चा 48 सीटां जित्तिये अगली सरकार बनाने गितै तैयार ऐ।
- उपराज्यपाल मनोज सिन्हा होरें विधानसभा चुनाएं च मतदाताएं दी शमूलियत दी सराहना कीती ते चुनाए गेदे मिम्बरें गी ममारखां बी दित्तियां।
- प्रधानमंत्री नरेंद्र मोदी होर एशियाई शिखर सम्मेलन च शामिल होने गितै Laos दी यात्रा पर जाडन।
- बीजेपी नै जम्मू च विधानसभा चुनाएं च 29 सीटां जित्तिये हुनै तोड़ी दा बेहतरीन प्रदर्शन कीता ते कांग्रेस छड़ी इक्क सीट जित्तियै हुनै तोड़ी दे सब्बनें शा खराब प्रदर्शन रेआ।

<><><><><><>

JK Counting

नेशनल कांफ्रेंस ते कांग्रेस भ्याल जम्मू-कश्मीर च अगली सरकार बनाने गितै तैयार ऐ। नेकां पार्टी नै जम्मू-कश्मीर च 90 चा 42 सीटां जित्तिये इक्कली सब्बनें शा बड्डी पार्टी बनिये उभरी

ते एहदी भ्याल भारतीय राश्ट्रीय कांग्रेस नै 6 सीटां जितियां न। भारतीय जनता पार्टी नै 29 सीटां जितियां न। पीडीपी नै 3 सीटां जितियां न। 7 सीटां आजाद मेदवारें अपने नां कीतियां। नेशनल कांफ्रेंस दे नेता ते साबका मुखमंत्री उमर अब्दुल्ला होरें बडगाम ते गांदरबल आलियां दवै सीटां जिती लैतियां न। जम्मू-कश्मीर कांग्रेस प्रमुख तारिक हमीद करी होरें सेंट्रल शेलटिंग थमां जित दर्ज कीती, जम्मू-कश्मीर पीपल्स कांफ्रेंस दे सज्जाद गनी लोन होरें हंदवाड़ा थमां जित दर्ज कीती। सीपीआई-एम दे मोहम्मद युसुफ तारीगामी होरें कुलगाम असंबली हल्के थमां जित दर्ज कीती। पीडीपी नेता ते पार्टी प्रमुख महबूबा मुफ्ती हुंदी थी इल्लिजा मुफ्ती होर बिजबिहाड़ा सीट थमां हारी गइयां। नेशनल कांफ्रेंस दे नेता नासिर असलम वानी होर कुपवाड़ा थवां हारी गए। कांग्रेस दे रमन भल्ला ते तारा चंद होर बी अपनी-अपनी सीट थवां हारी गए न। भारतीय जनता पार्टी दे प्रदेश अध्यक्ष रविंद्र रैना होर नौशैहरा सीट थवां चुनां हारी गए न।

<><><><><><>

LG-Congratulate

उपराज्यपाल मनोज सिन्हा होरें जम्मू-कश्मीर दे लोकें दा धन्नवाद कीता ते चुनां अधिकारियें, जम्मू-कश्मीर पुलस ते सुरक्षा बलें दा इत्थे रमानदारी, आजदाना ते पारदर्शी ढंग्गें नै विधानसभा चुनां कराने दे प्रयासें दी सराहना बी कीती। इक सोशल मीडिया पोस्ट च उपराज्यपाल होरें विधानसभा लेई चुनोए गेदे मेंबरें ते नेशनल कांफ्रेंस दी अगुवाई आहली भ्याल गी चुनां च जित गितै ममारखां दितियां। पोस्ट च उपराज्यपाल होरें आखेआ जे सब्बनें जेत्तू मेदवारें ते एन.सी दी अगुवाई आहली भ्याल गी दिली मुबारखां। उनें सब्बनें गी जम्मू-कश्मीर दे विकास ते लोकें दी भलाई बेहतरी लेई रलिये कम्म करने दी गुजारश कीती। उनें आखेआ जे शांतिपूर्ण चुनां प्रक्रिया ते करोड़ां बद्दे मतदाताएं दी शमूलियत लोकतंत्र दी जींदी-जागदी मिसाल ऐ।

<><><><><><>

NC-Farooq

नेशनल काँग्रेस दे प्रधान डॉ. फारूक अब्दुल्ला होरें अज्ज आखेआ जे एन.सी ते काँग्रेस दे गठबंधन आली सरकार दा मकसद प्रदेश दे दौनें खितें बशकार मतभेदें ते फर्कोफर्किं गी घट्ट करना ते हिंदु समुदाय अंदर बसाह-भरोसा कायम करना होगं उनें आखेआ जे ओह पूरी कोशश करडन जे ओह कश्मीर आला लेखा गै जम्मू दे लोकें बारै बी इक बरोबर सोच रक्खडन ते दौनें खितें बशकार बंड नेई पौन देडन। उनें आखेआ जे जम्मू दिआं समस्यां हल करना बी उंदी जिम्मेदारी ऐ।

<><><><><><>

NC-Statehood

नेशनल काँग्रेस उपाध्यक्ष उमर अब्दुल्ला होरें आखेआ जे नेशनल काँग्रेस भ्याल सरकार एहदी पैहली कैबिनेट बैठका च जम्मू-कश्मीर दा राज्य दा दर्जा बहाल करने दी मंग गितै इक प्रस्ताव पास करोग। मीडिया कर्मियें कन्नै गल्ल करदे होई उमर होरें आखेआ जे सरकार बनने दे बाद पैहलकी कैबिनेट च कैबिनेट केंद्र उप्पर जोर पाग जे जम्मू-कश्मीर दा राज्य दा दर्जा बहाल कीता जा जिस गितै इक प्रस्ताव बी पास कीता जाग। फही सरकार गी उस प्रस्ताव गी प्रधानमंत्री हुंदे अगगे पेश करना लोड़चदा ऐ। उनें मेद बुज्झी जे जम्मू-कश्मीर कश्मीर च सरकार सुचारू ढंग्गै नै कम्म करोग। नेशनल काँग्रेस नेता होरें आखेआ जे सरकार कन्नै मतभेद कन्ने किश बी हासल नेई होई सकोग।

<><><><><><>

Congress Introspect

जम्मू-कश्मीर प्रदेश काँग्रेस दे प्रमुख तारिक हमीद कर्रा होरें आखेआ ऐ जे उंदी पार्टी जम्मू खिते च असैम्बली चुनाएं च अपने माड़े प्रदर्शन दे पिच्छे दिएं वजहें पर पक्क गै विचार करोग। उनें इब्बी आरोप लाया जे प्रशासन दी तरफा बी किश कमियां रेइयां न। उआं कर्रा होरें साफ आखेआ

जे ओह पार्टी दे जम्मू च प्रदर्शन गी लेइयै मंथन पक्क गै करडन। कांग्रेस नै इत्थे 32एं सीटें पर चुनां लड़ेया ते छड़ी 6 सीटां गै जित्तियां जिंदे चा 1 जम्मू संभाग दे राजौरी जिले दी ऐ।

<><><><><><>

TA-Soldier

सुरक्षाबलें घाटी दे अनंतनाग जिले थमां लापता इक जोआन दा गोलियें कन्नै छलनी शव अज्ज बरामद कीता ऐ। हासल जानकारी मुजब टेरीटोरियल आर्मी दा जवान हिलाल अहमद भट्टा जेहड़ा कल्लै थमां लापता हा, दा शव अज्ज अनंतनाग दे उतरासू इलाके च संगलान आले जंगलें थमां बरामद कीता गेआ ऐ। मेडिकल औपचारिकताएं लेई शव गी पैहले अस्पताल लेता गेआ। एहदे शा पैहले श्रीनगर च स्थित फौज दी चिनार कोर नै दस्सेआ जे कोकरनाग दे काजवान जंगलें च फौज, पुलस ते होरनें एजेंसिएं आस्सेया सांझे तौर पर आतंकवाद रोधी अभियान चलाया गेआ। एह अभियान पूरी रात चलेया ते टेरीटोरियल आर्मी दे इक जवान दे लापता होई जाने दी जानकारी बी सामने आई ही जेदा अज्ज शव बरामद कीता गेआ ऐ।

<><><><><><>

PM-LAOS

प्रधानमंत्री नरेंद्र मोदी होर कल थमां Laos च Vietntiane दे दऊं दिनें दे दौरें पर होडन। नमीं दिल्ली च इक संवाददाता सम्मेलन गी संबोधित करदे होई विदेश मामले दे मंत्रालय च पूर्वी सचिव जयदीप मजूमदार होरें आखेआ जे दौरें दौरान मोदी होर 21मां एशियन भारत शिखर सम्मेलन ते 19मां पूर्व एशियाई शिखर सम्मेलन च शामिल होडन। मजूमदार होरें जानकारी दिती जे एशियन भारत शिखर सम्मेलन च एह प्रधानमंत्री हुंदी 10मीं बारी शमूलियत होग। उनें आखेआ जे प्रधानमंत्री मोदी होर Vietntiane दा दौरा Laos दे प्रधानमंत्री Sonexay Siphandone हुंदे साद्दे पर करा'रदे न। श्री मजूमदार होरें आखेआ जे प्रधानमंत्री मोदी ते उंदे नै एशियन मुल्खें दियें

सरकारें दे होरनें शीर्ष मंत्री होर भारत ते एशियन बश्कार रिश्ते दी प्रगति दा जायजा लेंगन ते भविक्ख च बी रिश्ते गी अग्गे तोड़ी लेई जाने गितै दिशा तय करोग।

<><><><><><>

BJP-Best-Performance

भारतीय जनता पार्टी नै जम्मू संभाग च 29 सीटां जित्तिये अजे तोहड़ी दा अपना बेहतरीन प्रदर्शन कीता ऐ जदके कांग्रेस नै जम्मू संभाग च अपना अजे तोड़ी दा सब्बनें शा खराब प्रदर्शन करदे होई छड़ी इक गै सीट जित्ती ऐ। कांग्रेस गी राजौरी च शड़ी इक सीट हासल होई। औदे बड्डे नेता जेदे च साबका उप मुखमंत्री तारा चंद ते किश साबका मंत्री शामिल न, गी हार दा सामना करना पेआ ऐ। भारतीय जनता पार्टी गी बी तगड़ा झटका लग्गा ऐ की जे पार्टी दे प्रदेश अध्यक्ष रविंद्र रैणा होरे गी हार दा सामना करना पेआ ऐ। जम्मू खित्ते दी 43 सीटे चा 29 सीटां हासल करिए बीजेपी इक्कली बड्डी पार्टी बनिए उभरी ऐ। नेशनल कांफ्रेंस गी 7 सीटां हासल होइयां न। त्री थाहर पर आजाद मेदवार रेय जिनें 5 सीटां हासल कीतियां। आम आदमी पार्टी गी बी इक सीट थोई। कांग्रेस गी इक सीट हासल होई। गुलाम नबी आजाद हुंदी पार्टी डी.पी.ए.पी, पीडीपी, बीएसपी, पेंथर्स पार्टी, जे.के.ए.पी गी कोई सीट हासिल नेई होई।

<><><><><><>

BJP-SC-ST

भारतीय जनता पार्टी नै विधानसभा चुनाएं च लगातार दुई बारी जम्मू खित्ते च अनुसूचित जाति लेई आरक्षित सारियां 7 सीटां जित्तियां न, पर अनुसूचित जन जाति लेई आरक्षित 6 सीटे पर उसी हार दा साकना करना पेआ। कुल 9 सीटां एस.टी लेई केंद्र शासित प्रदेश च आरक्षित न जिंदे चा 6 जम्मू खित्ते च न ते त्रै कश्मीर घाटी च न। बीजेपी नै अखनूर, मढ़, बिश्नाह, सुचेतगढ़, रामगढ़, कठुआ ते रामनगर आली सीटे पर जित्त हासल कीती। बीजेपी नै जम्मू खित्ते च नमी बनाई गेदी

6 सीटें चा 5 पर जित हासल कीती। पाडर, डोडा वेस्ट, उधमपुर ईस्ट, श्री माता वैष्णो देवी कटड़ा, रामगढ़ पर जित दर्ज कीती। पार्टी नै 5 प्रमुख श्राइन आली सीटें श्री माता वैष्णो देवी, रियासी च शिवखोड़ी, पाडर नागसैनी जित्थे मचेल माता ऐ, बिलावर सुकराला देवी ते जसरोटा जित्थे जसरोटा आली माता ऐ पर जित हासल कीती।

<><><><><><>

Women-MLA

जम्मू-कश्मीर दी विधानसभा च ऐगती त्रै महिला विधायकें दी एंट्री बी होआ करदी ऐ। इंदे च नेशनल कांफ्रेंस दिआं मेदवार ते साबका मंत्री सकीना इतू, बीजेपी दिआं शगुन परिहार ते नेशनल कांफ्रेंस दिआं शमीम फिरदौस शामिल न। सकीना इततू होरें कुलगाम जिले दी डी.एच.पोरा असैम्बली सीट परा 36 जहार 623 वोट लेइयै गुलजार अहमद डार होरें गी शिकस्त दिती। नेशनल कांफ्रेंस दिएं गै शमीम फिरदौस होरें श्रीनगर जिले दी हब्बाकदल सीट जिती। उनें बीजेपी दे अशोक कुमार भट्ट होरें गी 9 जहार 538 वोटें कन्नै हराया। इंदे अलावा बीजेपी दिएं नौजवान 29एं बरें दी नेता शगुन परिहार होरें नेशनल कांफ्रेंस दे दिग्गज नेता सज्जाद अहमद किचलू होरें गी छड़े 521 वोटें दे फर्क कन्नै हराया ऐ।

<><><><><><>

JMC

जम्मू नगर निगम दे कमिशनर डॉक्टर देवांश यादव होरें अज्ज न्यू प्लाट, टाली मोड़, जानीपुर, रूप नगर, मुट्ठी ते कन्नै लगदे होरनें इलाकें दा दौरा लाइयै उत्थे तोढ़ चाढ़ी जा'रदी बक्ख-बक्ख गतिविधिएं दा जायजा लैता। साफ-सफाई मतल्लक कम्में दा निरीक्षण करदे होई कमिशनर हारें अलॉट कीते गेदे वार्डें च नियमित तौर पर साफ-सफाई दे निर्देश दिते। उनें सरबंधत अधिकारिणें गी आखेआ जे ओह लोके गी उंदे वार्डें च कूड़ा कचरा किट्ठा करने लेई कम्मै पर लाई गेदी

गड्डिं दा लाह ठोआने बारै जागरूक बनान। उनें आखेआ जे अपने शैहरा गी साफ-सुथरा रक्खना हर नागरिक दी जिम्मेदारी ऐ।

<><><><><><>

Kathua-Agriculture

कठुआ दा राई-बाई विभाग करसाने दी औदन गी दूना करने गितै मौसमी रूतै बिजन बी खुम्बे दी खेती गी बढ़ावा देने गितै मते शा मते करसाने गी इस ताई आकर्षित करने ताई सिखलाई देने गितै विभाग नै जिला केंद्र खडैरे न। कठुआ दे मुख कृषि अफसर संजीव राय होरे आखेआ।

<><><><><><>

Women World Cup

महिलाएं दे आई.सी.सी टी-20 क्रिकेट विश्व कप च अज्ज संझा दुबई च ग्रुप-ए दे अपने त्रीये मैच च भारत दा मुकाबला श्रीलंका कन्ने होग। मैच भारती समे मताबक संझा साइडे 7 बजे शुरू होग। एहदे शा पैहले भारत दी टीम अपने रिवायती हरीफ पाकिस्तान पर 6एं विकेटे कन्ने जित दर्ज करी चुकी दी ऐ। उत्थे गै पाकिस्तान ते आस्ट्रेलिया थमां हारने परेंत श्रीलंका दी टीम ग्रुप-ए च सब्बनें शा हेठली थाहरै पर ऐ। मजमूदा चैंपियन आस्ट्रेलिया नै कल न्यूजीलैंड गी 60 रन्जे कन्ने हराई दिता। पैहले बल्लेबाजी करदे होई आस्ट्रेलिया नै 148 रन्ज बनाए जेदे परते च न्यूजीलैंड दी पूरी टीम 88 रन्ज गै बनाई सकी।

<><><><><><>

India-Bangladesh

मर्दे दी भारती क्रिकेट टीम अज्ज दिल्ली दे अरूण जेटली अंतरराष्ट्रीय स्टेडियम च त्रुं मैचें दी श्रृंखला दे दुए टी-20 अंतरराष्ट्रीय मैच च बंगलादेश कन्नै खेड्ढोग। मैच संझा 7 बजे शुरू होग। सूर्य कुमार यादव दी कप्तानी आली भारती टीम इस श्रृंखला च 1-0 कन्नै अगगे ऐ।

<><><><><><>